



Neema, Upendo na Ushirika

Somo la Juma Hili:

2 Kor. 8:9; Rum. 16:20; 1 Yoh. 4:8–11; 2 Kor. 13:11; Flp. 2:1, 2; Gal. 4:4–6.

“Neema ya Bwana Yesu Kristo, na pendo la Mungu, na ushirika wa Roho Mtakatifu ukae nanyi nyote” (2 Wakorintho 13:14).

Paulo anahitimisha 2 Wakorintho kwa kusesitiza tena vipengele muhimu alivyozungumzia katika nyaraka zake. Anafanya hivyo kwa amri tano (2 Kor. 13:11).

Amri ya kwanza, “Kwaherini,” inakumbushia vifungu vya awali katika waraka huu.

Amri ya pili, “Mtamilike,” inatafsiri neno moja katika lugha ya Kiyunani (*katartizō*), ambalo linaonekana hapa na katika 1 Wakorintho 1:10.

Ya tatu, “Mfarijike,” inarudia tena 2 Wakorintho 1:3–7. Paulo anaanza na kuhitimisha waraka wake wa pili kwa kutia moyo. Mungu anatutia shime ili tuwatie shime wengine (2 Kor. 1:4, 6).

Amri ya nne na ya tano, “Nieni mamoja, mkae katika amani” (2 Kor. 13:11), ni wito wa umoja. Hali hii ya furaha, urejeshaji, kutia moyo, umoja, na amani ndiyo hali ya kuwepo kwa Mungu, “Mungu wa upendo na amani” (2 Kor. 13:11). Inatokana na kazi ya Mungu wetu katika nafsi zake tatu anayoifanya katika moyo wa mwanadamu (2 Kor. 13:14).

Neema, upendo na ushirika vinatokana na kazi ya Mungu aliye katika nafsi tatu anayoifanya kwa ajili yetu. Sifa hizi tatu za Kikristo zinakuza hali inayojulikana kwa kuwepo kwa Mungu.

***Jifunze somo la juma hili kwa maandalizi ya Sabato ya Septemba 26.**

Neema ya Yesu

Inatia moyo kwamba mwishoni mwa 2 Wakorintho, tunaona neema ya Yesu ikirejelewa, kama vile katika utangulizi (2 Kor. 1:2, 2 Kor. 13:14). Paulo anaanza na kuhitimisha waraka huu kwa kurejelea neema Yake. Kama tulivyoona mwanzoni mwa robo hii, hakuweza kuacha kumfikiria na kumzungumzia Yesu.

“Maana mmejua neema ya Bwana wetu Yesu Kristo, jinsi alivyokuwa maskini kwa ajili yenu, ingawa alikuwa tajiri, ili kwamba ninyi mpate kuwa matajiri kwa umaskini wake” (2 Kor. 8:9).

Neema ya Yesu ni ya ajabu na isiyozuilika kiasi gani. Aliacha utajiri wa kuwepo kwake milele mbinguni na kuwa maskini. Alitembea kwenye barabara zenye vumbi za Galilaya ya kale. “Alijinyenyekeza akawa mtii hata mauti, naam, mauti ya msalaba” (Flp. 2:8). Alifanya hivyo ili sisi tuwe “matajiri,” yaani, tupate nafasi ya kuwa pamoja Naye mbinguni. Ni vigumu kwetu, ambao tunajua tu dunia ya dhambi, na kifo, na mateso, hata hatuwezi kufahamu ilichomaanisha Yesu kuziacha nyua za mbinguni ili kuja hapa na kutoa maisha Yake kwa ajili yetu.

SOMA

Warumi 16:20, Wagalatia 6:18, Wafilipi 4:23 na 1 Wathesalonike 5:28. Ni fundisho gani muhimu unaloliona katika vifungu hivi?

Paulo anarejelea neema ya Yesu mara nyingi sana katika nyaraka zake. Baadhi ya lulu ni pamoja na, “Kipawa kilicho katika neema ya... Yesu Kristo kimezidi kwa ajili ya wale wengi” (Rum. 5:15). Wale wanaopokea wingi huu wa neema “watatawala katika uzima kwa... Yesu” (Rum. 5:17). Kama inavyotokea katika 2 Wakorintho, Paulo pia anaanza na kuhitimisha nyaraka zingine kwa kuitaja neema ya Yesu (Rum. 1:7, Rum. 16:20, 1 Kor. 1:3, 1 Kor. 16:23, Gal. 1:3, Gal. 6:18, Flp. 1:2, Flp. 4:23). Mada hii ilishughulisha mawazo yake, na alitaka ijaze akili ya Wakorintho, pia.

Hili ndilo lilikuwa tamanio lake kwa makanisa yote. Tazama kile anachowaambia Waefeso: “Neema na iwe kwa wote wampendao Bwana wetu Yesu Kristo katika hali ya kutokuharibika” (Efe. 6:24). Je, angetamani sisi tumpende Yesu kwa kiwango chini ya hicho, upendo usiokoma? Kwa hakika sivyo. Hata hivyo, tamanio lake ilikuwa kwamba neema ya Yesu iwafike “kwa hao walio wengi” (2 Kor. 4:15) na kuwatosha kama ilivyokuwa kwake (2 Kor. 12:9).

Tafakari neema ya Mungu kwako hivi. Unastahili nini kutokana na mambo uliyosema na kuyafanya? Hata hivyo, neema ya Mungu inakupatia nini badala yake?

Upendo wa Mungu

“Neema ya Bwana Yesu Kristo, na pendo la Mungu, na ushirika wa Roho Mtakatifu ukae nanyi nyote.” (2 Kor. 13:14). Kwa aya hii, Paulo anahitimisha waraka wake wa pili. Ona kwamba anataja Nafsi tatu za Utatu Mtakatifu kwa mpangilio huu—Mwana, Baba, na Roho Mtakatifu. Ni kupitia kazi ya wote watatu kwamba tunaweza kuelewa vizuri zaidi kile Mungu alichio na kile alichotufanyia.

SOMA

Yohana 3:16, 17; Warumi 8:37–39; na 1 Yohana 4:8–11. Vifungu hivi vinatuambia nini kuhusu upendo wa Mungu?

1 Yohana 4:8 inasema kwamba “Mungu ni upendo.” Upendo ni sifa muhimu ya Mungu. Yohana anasisitiza kwamba tunaweza kujua upendo kwa kuwa Mungu alimtoa Mwanawe pekee afe kwa ajili yetu (Yn. 3:16). Mungu alimtuma Yesu katika utume wa wokovu (Yn. 3:17), na hii ilikuwa sehemu ya mradi wa wokovu (Mdo. 3:20, 21; 1 Yoh. 4:10, 14). Yesu alimrejelea Baba mara kadhaa katika Injili kama aliyemtuma (Mt. 10:40, Mk. 9:37).

Katika kauli ya ajabu, Paulo anasema, “Bali Mungu aonyesha pendo lake yeye mwenyewe kwetu sisi, kwa kuwa Kristo alikufa kwa ajili yetu, tulipokuwa tungali wenye dhambi” (Rum. 5:8). Tunaweza kuona kwa mtupo wa jicho upendo wa Mungu katika uhusiano mwema kati ya mume na mke, pamoja na wazazi na watoto wao, katika urafiki wa dhati, na kadhalika. Tunaweza pia kuuona upendo wa Mungu katika asili. Kuhusiana na hilo, Ellen G. White asema, “‘Mungu ni upendo’ imeandikwa juu ya kila chipukizi, juu ya kila jani linalochipuka. Ndege wazuri wanaolijaza anga kwa nyimbo zao za furaha, maua yenye rangi za kupendeza, katika uzuri wake yanatoa manukato katika hewa, miti mirefu ya misitu yenye majani ya kijani kibichi—vyote vinashuhudia juu ya utunzaji mwema, wa baba wa Mungu wetu na shauku Yake ya kuwafanya watoto Wake kuna wenye furaha.”—*Steps to Christ*, uk. 10.

Hata hivyo, hakuna kitu kinachoweza kusadikisha zaidi kuliko Mungu kumtoa Yesu kuwa dhabihu kwa ajili ya dhambi zetu. Tunapoelewa kwamba Mungu alitupenda hadi kumtuma Yesu kuutoa uhai Wake kwa ajili yetu, mwitikio wetu ni kuwa tayari “kutoa uhai wetu kwa ajili ya hao ndugu” (1 Yoh. 3:16).

Paulo alitaka Wakorintho waishi kwa umoja. Walakini, bila upendo, hakuna umoja. Ndiyo maana aliwafundisha kwamba “upendo hujenga” (1 Kor. 8:1) na kwamba bila upendo, kila kitu ni bure na ni tupu (1 Kor. 13:1–3). Kwa hiyo, yote tunayofanya ni lazima tuyafanywe kwa upendo (1 Kor. 16:14), upendo ambao ni mwendelezo wa upendo wa Mungu.

Tungepoteza nini katika injili ikiwa Yesu Mwenyewe asingekuwa Mungu kamili na wa milele?

Mungu wa Upendo

Katika ulimwengu wa kale wa kipagani, watu hawakuamini kwamba miungu iliwapenda wanadamu. Badala yake, miungu hiyo ilikuwa na nia mbaya na yenye ghadhabu, na ilipaswa kutulizwa. Wazo la Mungu wa upendo, kama tunavyoona katika Biblia, lilikuwa jambo geni. Ingawa kauli hii ilikuwa ya kushangaza katika wakati wake, Paulo anamwelezea Mungu wetu kama “Mungu wa upendo na amani” (2 Kor. 13:11).

SOMA

2 Wakorintho 13:11. Unawezaje kupata tumaini kutokana na kile kinachosemwa hapa? Unawezaje kupata uzoefu bora zaidi wa kile aya hii inachofundisha?

Kirai “Mungu wa upendo na amani” kinaweza kufasiriwa kwa njia mbili tofauti. Kwa upande mmoja, Mungu anaonekana kuwa chanzo cha upendo na amani. Kwa upande mwingine, Mungu ana sifa ya upendo na amani. Si lazima, hata hivyo, kuamua kati ya njia hizo mbili. Kwa sababu upendo na amani ni sifa za asili za Mungu, Yeye anatupatia upendo na amani.

Mahali pengine, Paulo anamrejelea Mungu kama “Mungu mwenye saburi na faraja” (Rum. 15:5); “wa tumaini” (Rum. 15:13); “wa amani” (Rum. 15:33, Rum. 16:20, 1 Kor. 14:33, Flp. 4:9, 1 The. 5:23), “Baba wa rehema” (2 Kor. 1:3) na “Mungu wa faraja yote” (2 Kor. 1:3). Mungu ndiye chanzo cha baraka hizi zote. Anatupa vyote kutokana na upendo Wake usio na ukomo.

Pia, ingawa kirai “Mungu wa amani” ni cha kawaida kwa kiasi fulani katika Biblia, kirai “Mungu wa upendo” kinatokea hapa tu (2 Kor. 13:11) na, kwa hiyo, kinastahili tafakari yetu ya kina zaidi.

Kama wafasiri wengi walivyoona, rejea ya Paulo kwa Mungu wa upendo aya chache kabla ya baraka ya Utatu Mtakatifu katika 2 Wakorintho 13:14 inapendekeza kwamba anamfikiri Mungu kama mwenye Nafsi tatu. “Ingawa anatumia neno ‘Mungu’ hapa kama mmoja wa wale watatu, ufahamu wake juu ya Yesu na Roho mahali pengine katika nyaraka zake... unatulazimisha kuona kirai kizima kama kinachomwelezea Mungu mmoja ambaye kanisa la awali lilikuja kumwona katika hali ya utatu. Ingekuwa zaidi ya karne moja kabla ya wanateolojia... kuanza kutumia maneno kama ‘utatu’ kama njia ya hati mkato ya kueleza kile ambacho Paulo tayari anakieleza.” —Tom Wright, *Paul for Everyone: 2 Corinthians* (London: Society for Promoting Christian Knowledge, 2004), uk. 148.

Tunaamini katika Mungu mmoja, umoja wa nafsi tatu za milele katika uhusiano wa upendo. Mungu huyu mwenye nafsi Tatu anatupenda na anatuita kupendana sisi kwa sisi kwa njia inayoakisi upendo kati Yao.

Ushirika wa Roho Mtakatifu

Neema ya Yesu haidhihirishi tu upendo wa Mungu kwetu, bali pia inaleta ushirika wa Roho kama matokeo zaidi ya upendo huo. Wakati huo huo, ushirika una chanzo chake katika upendo wa Mungu. Na hiyo ni kwa sababu bila upendo hakuna ushirika. Kama Paulo aandikavyo: “Basi ikiwako faraja yo yote katika Kristo, yakiwako matulizo yo yote ya mapenzi, ukiwako ushirika wo wote wa Roho, ikiwako huruma yo yote na rehema, ijilizeni furaha yangu, ili mwe na nia moja, wenye mapenzi mamoya, wenye roho moja, mkinia mamoya” (*Flp. 2:1, 2*).

Baadhi ya watu wanasema kwamba Roho Mtakatifu ni nguvu au uwezo tu, lakini hilo haliwezi kuwa kweli. Hata hivyo, kwa nini Paulo alitaja nafsi mbili—Baba na Mwana—pamoja na “nguvu” tu katika kanuni/mfumo wa utatu? Hilo lisingekuwa na maana. Kama vile Baba na Mwana wanavyoelezewa katika uhusiano binafsi (*2 Kor. 1:3, 2 Kor. 11:31*), uhusiano wa Roho na nafsi hizi unatupeleka katika hitimisho kwamba Yeye pia ni nafsi (*Rum. 8:15, 16; tazama pia Yn. 14:16, 17, 26; Yn. 15:26*).

Kirai “ushirika wa Roho” (*Flp. 2:1*) kinaweza kueleweka kwa njia mbili. Kinaweza kumaanisha ushirika kati ya mtu na mwingine unaotolewa na Roho, au ushirika na Roho Mwenyewe. Wafasiri kadhaa wa Biblia wanatoa hoja kwamba maana hizi hazitengani. Hata hivyo, ushirika na mtu mwingine ni matokeo ya ushirika na Roho.

SOMA

2 Wakorintho 8:1–5. Ni sababu gani inayowezekana ambayo ingeweza kuwa nyuma ya utayari wa Wamakedonia kutoa sadaka zao kwa ukarimu kama huo?

Paulo ana mengi ya kusema kuhusu kazi ya Roho. Katika 1 na 2 Wakorintho, kuna rejea zaidi ya arobaini za Roho Mtakatifu. Roho Mtakatifu anasimamia kujengwa kwa kanisa (*1 Kor. 14:12*), anawawezesha watu kwa ajili ya utume (*1 Kor. 2:4, 5*), anatufunulia mafumbo ya Mungu (*1 Kor. 2:10, 11*) na kutufundisha (*1 Kor. 2:13*), anakaa ndani yetu (*1 Kor. 3:16, 1 Kor. 6:19*), anafanya kazi pamoja na Kristo ili tuhesabiwe haki, (*1 Kor. 6:11*), anatoa karama za Roho kwa kanisa (*1 Wakorintho 12–14*), anatutia muhuri kwa ajili ya wokovu (*2 Kor. 1:22*), anatia sheria katika mioyo ya wanadamu (*2 Kor. 3:3*), na anatoa maisha mapya katika Kristo (*2 Kor. 3:6*) na uhuru kutoka kwa dhambi (*2 Kor. 3:17*). Kwa hakika, hatuwezi kuishi bila Roho Mtakatifu.

Kwa nini, pia, kufahamu uungu wa Roho Mtakatifu ni muhimu ili kuelewa kikamilifu upendo wa Mungu kwetu?

Mungu Wetu Mwenye Nafsi Tatu

Tunaposoma 2 Wakorintho 13:14, mtu anaweza kufikiri kwamba Kristo ndiye chanzo pekee cha neema, Mungu ndiye chanzo pekee cha upendo, na Roho Mtakatifu ndiye chanzo pekee cha ushirika, lakini hilo si kweli kabisa.

SOMA

1 Wakorintho 1:3, 4, 9; 1 Wakorintho 10:16; 2 Wakorintho 1:2, 12; Warumi 8:35; Warumi 15:30; Wagalatia 2:20; na Waefeso 3:19. Vifungu hivi vinasema nini kuhusu neema, upendo na ushirika kuhusiana na washirika wa Utatu?

Baba, Mwana, na Roho Mtakatifu wanafanya kazi pamoja kwa ajili ya wokovu wetu. Neema, upendo, na ushirika havitokani kwa mmoja tu bali kwa Hao watatu. Hata hivyo, kila Mmoja ana kazi maalumu katika historia ya wokovu. Paulo anafahamu hilo na anasisitiza fundisho hili katika nyaraka zake. Kwa mfano, mpango wa wokovu unaelezewa kwa iktisadi ya maneno ya kushangaza katika Wagalatia 4:4–6, pamoja na ushiriki wa washirika watatu wa Uungu. Mungu Baba alimtuma Yesu, jambo linalodokeza kwamba Baba ndiye Chanzo cha mpango huo (*Gal. 4:4*). Mwana alizaliwa na mwanamke (*Gal. 4:4*), inayorejelea Kutwaa asili ya mwanadamu na kuelekeza katika utimifu wa ahadi ya kale (*Mwa. 3:15*). Mwana alitukomboza na kuturejesha katika uhusiano sahihi na Baba, ambaye Shetani alisema uongo juu Yake (*Mwa. 3:5*). Na Roho Mtakatifu anahalalisha utambulisho wetu kama watoto wa Mungu (*Gal. 4:6*).

Kuna rejea zingine kadhaa za Utatu katika nyaraka za Paulo. Watatu hao wanatenda pamoja, kuliwezesha kanisa kwa ajili ya utume (*1 Kor. 12:4–6*), wanatupatia nguvu za kiroho (*Efe. 3:14–19*), na kukuza umoja wa kina kati ya washiriki wa kanisa, ule ambao ni nakala ya umoja ambao ni sehemu hasa ya uhusiano wa washirika wa Uungu (*Efe. 4:4–6*). Katika ufahamu wa Paulo, si tu kwamba Mungu ni mwenye Nafsi tatu, bali pia Nafsi tatu za Uungu zinafanya kazi pamoja kwa ajili ya wokovu wetu (*Efe. 1:3, 13, 14*). Katika Waefeso, Paulo anaenda mbali hadi kusema kwamba lazima tujazwe na utimilifu wa Baba (*Efe. 3:19*), Mwana (*Efe. 4:13*) na Roho Mtakatifu (*Efe. 5:18*).

Katika kuhitimisha waraka wake kwa Wakorintho (*2 Kor. 13:14*), Paulo asingeweza kuhitimisha kwa ubora—kwa ahadi kwamba Wakuu watatu wa ulimwengu, watatu wa mbinguni, wangekuwa pamoja nasi sasa na katika zama zijazo.

Ni kwa namna gani ushirika kati ya washiriki wa kanisa unapaswa kuakisi uhusiano mzuri wa Uungu?

JIFUNZE ZAIDI

“‘Msifadhaike Mioyoni Mwenu,’ ” uk. 275–295, katika *Tumaini la Vizazi Vyote*, sehemu ya pili.

“Neema ya Yesu Kristo pekee ndiyo inayoweza kubadilisha moyo wa jiwe kuwa moyo wa nyama, na kuufanya kuwa hai kwa Mungu. ... Wanadamu hawana uwezo wa kuthibitisha roho, kuutakasa moyo. Ugonjwa wa kimaadili hauwezi kuponywa isipokuwa kwa uweza wa Tabibu Mkuu. Zawadi ya juu zaidi ya mbingu, Mwana Pekee wa Baba, aliyejaa neema na kweli, ndiye pekee awezaye kuwakomboa waliopotea.”—Ellen G. White, in *The Signs of the Times*, Mei 2, 1892.

“‘Mungu ni upendo.’ 1 Yohana 4:16. Asili Yake, sheria Yake, ni upendo. Daima imekuwa hivyo; daima itaendelea kuwa hivyo. ‘Yeye aliye juu, aliyetukuka, akaaye milele,’ ambaye ‘miendo Yake ilikuwa kama siku za kale’ habadiliki. Kwake Yeye ‘hakuna kubadilika, wala kivuli cha kugeuka-geuka.’ Isaya 57:15; Habakuki 3:6; Yakobo 1:17. Kila ishara ya nguvu ya uumbaji ni dhihirisho la upendo usio na mwisho. Ukuu wa Mungu huhusisha baraka kamili kwa viumbe vyote. ... Historia ya pambano kuu kati ya wema na uovu, tangu wakati lilipoanza kwa mara ya kwanza mbinguni hadi kuondolewa kwa uasi mwishoni na kukomeshwa kabisa kwa dhambi, pia ni uthibitisho wa upendo wa Mungu usiobadilika.”—Ellen G. White, *Wazee na Manabii*, sehemu ya kwanza, uk. 17.

“Tunapaswa kutambua kwamba Roho Mtakatifu... ni nafsi hai kama Mungu alivyo nafsi. ...Roho Mtakatifu ni nafsi, vinginevyo asingeweza kushuhudia roho zetu na kwa roho zetu kwamba sisi ni watoto wa Mungu. Lazima pia awe nafsi ya Uungu, vinginevyo asingeweza kuchunguza siri zilizofichwa katika nia ya Mungu.”—Ellen G. White, *Imani lokoayo*, uk. 47.

“Kuna nafsi tatu hai za Uungu mbinguni; katika jina la hawa watatu wenye mamlaka—Baba, Mwana, na Roho Mtakatifu—wale wanaompokea Kristo kwa imani iliyo hai wanabatizwa, na hawa wenye mamlaka watashirikiana na raia wa mbinguni walio watiifu katika jitihada zao za kuishi maisha mapya katika Kristo.”—Ellen G. White, *Evangelism*, uk. 615.

MASWALI YA KUJADILI

1. Wimbo unaojulikana sana wa Kikristo unaitwa “Neema ya Kushangaza.” Ni nini kinachoshangaza kuhusu neema ya Yesu?
2. Taswira ya upendo wa Mungu inaweza kupatikana katika mfano wa mwana mpotevu. Tunajuaje kwamba baba katika mfano huu ni baba mwenye upendo?
3. Mekanisa mahalia yanawezaje kuonesha kwamba “ushirika wa Roho” upo kweli?